

MESTER SIGUI CU E PREPARACIONNAN PA STATUS APARTE

Segun sindicato di empleadonan publico

ORANJESTAD(AAN)—

Segun sindicato SEPA, e hecho cu Aruba ta confrontando problemanan ariba tereno economico no por ta motibo pa wanta e cambionan di 1986 ariba tereno di structura estatal.

SEPA ta di opinion cu maske nos ta pasando momentonan di crisis, no por ta posibel cu nos ta tolera cu sin mas principonan ta wordo entrega.

E derecho di autodeterminacion pa Aruba ta e principio mas sagrado pa e pueblo di Aruba y entegando e principio aki nos lo ta inicia un proce-

so di degeneracion cual sigur lo hiba nos den rumbo negativo. Mas ainda, si nos considera cu e situacion na e otro islanan di Antillas no ta miho y ta pinta scur. Si nos coge por ehemplo e situacion financiero di e isla di Curacao, tur pronosticacion ta indica un deficit den 1986 di 150 millon pa 200 millon florin. Esaki ta igual o mas peor cu Aruba cu deficit di alrededor di 160 millon florin.

E sindicato di empleadonan publico ta sigui muestra cu pa 1987 esaki

lo bira mas peor pa Curacao. A ser menciona un cantidad di motibonan pa ilustra esaki, entre otro reduccion di entrada di offshore, posiblemente Shell lo abandona Curacao y si Shell keda mes, gobierno di Curacao mester participa financieramente cu masha placa den dje.

ALM lo mester di mas inyeccion y tambe Dokmij, etc.

SEPA ta considera cu tur pueblo cu ta respeta su mes mester opta pa e derecho di autodeterminacion pa eherce su soberania. Tur sector di co-

munidad Arubano a reconoce e derecho di autodeterminacion pa Aruba. E representacion actual den Staten ta desventahoso pa Aruba. E ultimo 20 añanan e pueblo di Aruba a manifesta cu mester bini cambionan den structura estatal; politiconan di Curacao a rechaza un union estrecho cu Aruba a base di igualdad; seramento di Lago a causa problemanan grandi ariba tereno socio-economico y financiero; malgobernacion na Aruba a empeora e situacion di crisis y malgastamento di placa no a permiti pa nos tin un reserva pa 1986; e lucha di liberacion di e trahador Arubano ta profundamente liga na e ehercicio di e derecho di autodeterminacion di Aruba; posponemento o eliminacion di Status Aparte ta mantene e situacion actual di

12-8 cu tur indicacion cu futuro cercano e federacion lo ta uno di one man one vote; mantencion di e situacion actual lo trece un enorme agitacion entre e pueblonan di Aruba y Curacao y e lucha Arubano lo sigui su rumbo cu instigacionnan nacionalista treci pa demagogonan, cual lo stop tur lucha pa cambionan social na Aruba, entre otro pa sindicalismo Arubano, segun e consideracionnan di SEPA.

SEPA ta di opinion cu mester sigui cu e preparacion pa Status Aparte cu mas dedicacion y seriedad y determinacion.

Gobernantenan di Aruba y Curacao entretanto mester sinta conhuntamente pa trece plannan pa enfrente e problemanan di indole socio-economico, e sindicato a laga sa.

SEPA NO TA KERE DEN NECESIDAD DI OTRO REFERENDUM

Ariba Status Aparte

ORANJESTAD(AAN)—SEPA no ta kere den e necesidad pa un referendum tuma lugar atrobe y ta bisa cu hasta e referendum di 1977 tabata di mas caba.

Referendum ta un medio pa cual por sondea e opinion di un grupo o pueblo ariba un topico, cual lo por ser usa como base pa un decision.

Pa un derecho sagrado manera e autodeterminacion, sin embargo e ta superfluo. No ta necesario pa puntra un pueblo si e ta pro of contra un derecho sagrado. Esaki a keda proba den tratamiento di e derecho ariba autode-


terminacion di e pueblo di Puerto Rico, unda cu Nacionnan Uni a dicidi cu no ta necesario puntra e pueblo, sino mester bay over pa ehecuta e derecho di e pueblo, segun e sindicato di empleadonan publico.

SEPA no ta kere den e necesidad pa un referendum pasobra hasta e referendum di 1977 e sindicato ta haya tabata di mas caba.

"Autodeterminacion, independencia ta derecho nan sagrado cual principonan sindical ta sostene 100 porciento, SEPA a muestra ariba.

A base di principio sindical SEPA lo sigui sostene autodeterminacion, independencia di Aruba, pues Status Aparte tambe, e comunicado di SEPA ta bisa entre otro.

Happy Valentine's Day



SPRITZER + FUHRMANN
ARUBA · BOÑAIRE · CURAÇAO · ST. MAARTEN · NEW YORK

Un tradition di confianza

